

sita, de qua fuit Amos propheta, Amos 1. 1. ibidem Ochozia, rege Israël, occisus & sepultus. Inter Thecuam & Engaddi, ad sinistram contra desertum Quarentanæ, est *castrum Herodium*, alto loco situm, ab Herode exstructum. A Thecuā duabus leucis inter Orientem & Austrum est *Zipb*, oppidum juxta desertum, Ziphæorum patria, ubi David vagabundus latuit, 1 Sam. xxiii. Huic contra Austrum adjacet *desertum Maon*, in quo est mons *Carmelus*, juxta quem Nabal repulit nuntios David, 1 Sam. xxv. 10, 11. nota est historia. Ab hoc deserto Maon inter Austrum & Orientem parum distat *mons Seir* sive *Idumæa*, quam terram filii Israël longo tempore jussi sunt circuire, Deut. ii. 1, 2, 3, 4. 2 Chron. xx. 10. Quod si à memorato deserto contra Austrum vadas, occurrit *terra Amalech*, quam jussus est Saul subvertere interfectis habitatoribus ejus, 1 Sam. xv. 2, 3. Ante terram Amalech contra mare Mortuum est *Cades-Barne*, locus unde Moses duodecem emisit exploratores, Num. xxxii. 8. A Bethleēm tres sunt leucæ versus Austrum ad *collem Rama*, in qua videtur tota Arabia usque ad Montem Seir, & omnia loca circa mare Mortuum, itemque littus Maris Magni à Joppe usque ad Gazam. A Rama duabus leucis prope viam, quæ ducit in Hebron, est *prædium Mamre*, ubi habitabat longo tempore Abram juxta ilicem, Gen. xiii. 18. Ab hac ilice per dimidiam leucam versus dexteram, est *Hebron* civitas illa *vetus*, olim *Cariatb-Arbe* dicta, Gen. v. 5. in qua regnavit David septem annis, 1 Reg. ii. 11. sitaque fuit in monte: hodiè præter magnas ruinas nihil ibi cernitur. sed ad tres jactus arcus Austrum versus, declinando tamen paululum ad Orientem est *Hebron nova*, exstructa in loco scilicet, ubi *spelunca duplex*, ubi sepulti sunt Adam & Eva, Abraham & Sara, Isaac & Rebecca, Jacob & Lea. Saraceni circa speluncam duplicem, quæ erat in ecclesia cathedrali, ædificaverunt munitionem. A spelunca duplici ad Occidentem, ad jactum arcus unum, est *ager Damascenus*, ubi plasmatus dicitur Adam, habetque argillam rubeam, flexibilem in modum ceræ, quæ per camelos in magna quantitate in Ægyptum, Æthiopiam, Indiam, & alia loca deportatur. Nam abutuntur ea in varias superstitiones. Juxta hunc agrum Damascenum ostenditur etiam locus, ubi Cain fratrem suum Abel occidit. Fabulantur quoque illic Adam & Evam multo tempore luxisse Abel filium suum in spelunca rupis cujusdam, quæ ad Austrum patet. Ab Hebron tribus leucis contra Austrum est *Dabir*, quæ & *Cariat-Sepher*, id est *civitas libri* seu *literarum*, de qua Josua, Cap. xv. 15. Ab Hebron tres numerantur leucæ contra Aquilonem, declinando paululum ad Occidentem, ad *Nebel-Escol*, id est, *torrentem Botri*, unde exploratores portaverunt palmitem uvæ, Num. xiii. 23, 24, 25. Ad lævam hujus vallis per dimidiam leucam descendit *rivus*, in quo Philippus baptizavit eunuchum Candacis Reginae, haud longè à *Sicelech*, Act. viii. 36, 37, 38. A Nehel-Escol octo numerantur leucæ versus Jerusalem, ad *domum Zachariæ*, quam intravit pregnans virgo Maria, salutatura Elisabeth, Luc. i. 40. A domo Zachariæ tres sunt leucæ versus Aquilonem, & itidem tres leucæ à Nicopoli contra Vulturum, ad *Nobe* civitatem sacerdotum, quæ nunc *Bochonopolis* dicitur, in via, quæ Diospolim ducit atque Ramatha, ubi David ab Abimelech accepit gladium Goliath Gethæi, 1 Sam. xxi. 9. Hæc de Jerusalem & locis circumjacentibus dicta sufficiant.

C A P. X.

Ab Acone versus Austrum iter.

Quatuor sunt leucæ ab Aconensi civitate ad oppidum *Caipha*, in pede montis Carmeli ad Aquilonem situm. A Caipha tres numerantur leucæ ad *Castrum peregrinorum*, fratrum militiæ templi, munitissimum quidem, & in corde Maris situm, talibus muris & antemuralibus cinctum, ut fere inexpugnabile sit. A Caipha ad leucam unam & dimidiam in monte Carmeli est *spelunca Elisei* & *mansio Elisei*: ubi hodiè habitant *fratres Carmelitæ*. A castro peregrinorum quatuor sunt leucæ ad *Cæsaream*, Palæstinæ metropolim, in qua fuit sedes archiepiscopalis, quam-

A a

que